

საქართველოს საავიაციო უნივერსიტეტი



„ვამტკიცებ“
რექტორი, პროფესორი

_____ ს. ტეფნაძე

ბრძანება N _____ „____“ _____ 20__ წ.

შპს საქართველოს საავიაციო უნივერსიტეტის
საბაკალავრო და სამაგისტრო ნაშრომების გაფორმებისა და
დაცვის ინსტრუქცია

თბილისი
2014

მუხლი 1. ზოგადი დებულებები

1. საბაკალავრო და სამაგისტრო ნაშრომების გაფორმებისა და დაცვის ინსტრუქცია (შემდგომში - ინსტრუქცია) აწესრიგებს საბაკალავრო და სამაგისტრო ნაშრომების გაფორმებასა და დაცვასთან დაკავშირებულ ტექნიკურ და პროცედურულ საკითხებს.

2. საბაკალავრო და სამაგისტრო ნაშრომების შესრულება სტუდენტს შეუძლია დამამთავრებელ სემესტრში, შესაბამისი საგანმანათლებლო პროგრამით გათვალისწინებული წინაპირობების დაკმაყოფილების შემთხვევაში.

3. საბაკალავრო და სამაგისტრო ნაშრომების შეფასების კრიტერიუმები დადგენილია შესაბამისი სილაბუსებით.

4. საბაკალავრო და სამაგისტრო ნაშრომების შეფასება ხდება შუალედური და დასკვნითი გამოცდების მეშვეობით. შუალედური შეფასება არის განმავითარებელი შეფასება (ტარდება ორჯერ), რომელიც მიზნად ისახავს სტუდენტის მიერ დაგეგმილი კვლევის პირველად შეფასებას, სწორი მიმართულების მიცემას და ე.წ. Feedback-ს თემის ხელმძღვანელის მხრიდან. ამასთან, სამაგისტრო ნაშრომის შესრულების შემთხვევაში თემის ხელმძღვანელი ყოველკვირეულად ინდივიდუალურად ხვდება სტუდენტებს მათი საჭიროების გათვალისწინებით და განიხილავს თემის ირგვლივ წამოჭრილ პრობლემურ საკითხებს. ამასთან, თემის ხელმძღვანელი კონსულტაციებს უწევს სტუდენტებს ელექტრონული ფოსტის მეშვეობითაც.

5. ამ მუხლის მე-4 პუნქტში მითითებული შეფასებების მიზანია ე.წ. მუდმივი მონიტორინგის განხორციელება სტუდენტის საქმიანობაზე, დროული რეკომენდაციების და მითითებების მიცემა, რაც საბოლოო ჯამში ორიენტირებული იქნება დახვეწილი ნაშრომის შექმნაზე. ასეთი სახის შეფასების სისტემის დამკვიდრებით შპს - საქართველოს საავიაციო უნივერსიტეტი ცდილობს შექმნას ეფექტიანი მექანიზმი განათლების ხარისხის განსავითარებლად და ხელი შეუწყოს სტუდენტთა მომავალ სამეცნიერო საქმიანობას.

მუხლი 2. საბაკალავრო და სამაგისტრო ნაშრომის დაცვის კომისია

1. საბაკალავრო და სამაგისტრო ნაშრომის დაცვის კომისია (შესაძლებელია იყოს ერთად ან ცალ-ცალკე) იქმნება რექტორის მიერ ფაკულტეტის საბჭოს მიერ წარდგენილი კანდიდატურების გათვალისწინებით. კომისიის შემადგენლობაში შედიან: ნაშრომის ხელმძღვანელი (სათათბირო ხმისუფლებით), ფაკულტეტის საბჭოს თავმჯდომარე და შესაბამისი დარგის არანაკლებ 2 სპეციალისტი. რექტორის გადაწყვეტილებით სათათბირო ხმის უფლებით შეიძლება მოწვეულ იქნენ პოტენციური დამსაქმებლები, რომლებთანაც უნივერსიტეტს გაფორმებული აქვს ურთიერთთანამშრომლობის მემორანდუმი.

2. საბაკალავრო და სამაგისტრო ნაშრომის დაცვის კომისია (შემდგომში - კომისია) უფლებამოსილია, თუ მას ესწრება 3 წევრი მაინც. ნაშრომი ფასდება 40 ქულით, რომელიც არის კომისიის თითოეული წევრის შეფასების საშუალო არითმეტიკული. სათათბირო ხმის უფლების მქონე წევრები შეფასების პროცედურაში არ იღებენ მონაწილეობას.

3. კომისიის გადაწყვეტილება ფორმდება კომისიის სხდომის ოქმით, რომელიც წარედგინება შესაბამის ფაკულტეტს და მხედველობაში მიიღება აკადემიური ხარისხის მინიჭების დროს.

4. ნაშრომის დაცვა საჯაროა და გრძელდება 10-15 წუთის განმავლობაში.

მუხლი 3. საბაკალავრო ნაშრომი და თემის ხელმძღვანელი

1. საბაკალავრო ნაშრომი არის წერითი პროექტი, რომელშიც უნდა გამოვლინდეს სტუდენტის ცოდნის დონის, შემოქმედებითი უნარ-ჩვევების ხარისხის შესაბამისობა აკადემიური პროგრამით განსაზღვრულ მოთხოვნებთან. საბაკალავრო ნაშრომის შესრულება ხდება ქართულ ენაზე. გამონაკლისია ინგლისურენოვანი საგანმანათლებლო პროგრამები. საბაკალავრო ნაშრომის მოცულობა შეადგენს 30-40 გვერდს. საბაკალავრო ნაშრომის მომზადებისას აუცილებელია გამოყენებულ იქნეს მინიმუმ 10 ნაშრომი ან სახელმძღვანელო.

2. საბაკალავრო ნაშრომის შესრულების პერიოდი მოიცავს ერთ სემესტრს. უნივერსიტეტის რექტორის ბრძანებით დამტკიცებული თემატიკიდან, სტუდენტი ირჩევს საბაკალავრო თემას, რომელსაც არეგისტრირებს ფაკულტეტზე. თემის შერჩევა ხდება თემის ხელმძღვანელთან შეთანხმებით. რექტორს შესაბამისი თემატიკა დასამტკიცებლად წარედგინება ფაკულტეტის დეკანის მიერ.

3. თემის ხელმძღვანელები შეირჩევიან ფაკულტეტის მიერ და მტკიცდებიან რექტორის ბრძანებით შესაბამისი თემატიკის მიხედვით. თითოეული საგანმანათლებლო პროგრამის ფარგლებში უნდა იყოს არანაკლებ სამი თემის ხელმძღვანელისა.

მუხლი 4. საბაკალავრო ნაშრომისადმი წაყენებული მოთხოვნები

1. საბაკალავრო ნაშრომის ტექსტი აკრეფილი უნდა იყოს სტანდარტული შრიფტით (Sylfaen), ძირითადი ნაწილის ზომა 12, სათაურები და ქვესათაურები - ზომა 14; სტრიქონებს შორის მანძილი - 1,5 ინტერვალი.

2. საბაკალავრო ნაშრომის სტრუქტურაში გათვალისწინებული უნდა იქნეს:

ა) თავფურცელი, რომელიც წარმოადგენს საბაკალავრო ნაშრომის პირველ გვერდს და რომელიც მოიცავს: უნივერსიტეტის სახელწოდებას, სტუდენტის სახელს და გვარს, ნაშრომის სათაურს, ფაკულტეტის სახელწოდებას, თემის ხელმძღვანელის სახელსა და გვარს;

ბ) აბრევიატურების ნუსხა (ასეთის არსებობის შემთხვევაში);

გ) სარჩევი, რომელშიც აისახება ნაშრომის ყველა თავის, ქვეთავისა და პარაგრაფის დასახელება გვერდების ნომრების მითითებით. გვერდების ნომრები უნდა განთავსდეს ფურცლის მარჯვენა ქვედა მხარეს;

დ) შესავალი, რომელიც წარმოადგენს ნაშრომის ზოგად ნაწილს და რომელშიც უნდა აისახოს არჩეული თემის აქტუალურობის დასაბუთება, მიზნები და გამოყენებული მეთოდები;

ე) ტექსტის ძირითადი ნაწილი, რომელიც შეიძლება დაიყოს თავებად, ქვეთავებად, პარაგრაფებად;

ვ) დასკვნა წარმოადგენს საბაკალავრო ნაშრომის შედეგების ამსახველ ნაწილს, რომელმაც უნდა უპასუხოს ყველა იმ ამოცანას, რომელიც ბაკალავრს

გამოაქვს საჯარო დაცვაზე. დასკვნაში სასურველია მოცემული იყოს რეკომენდაციები, ნაშრომში დასმული კონკრეტული პრობლემის გადასაჭრელად.

ზ) გამოყენებული ლიტერატურის ნუსხა წარმოდგენილ უნდა იქნეს ანბანური თანმიმდევრობით; ჯერ უნდა მიეთითოს გამოცემები ქართულ ენაზე, ხოლო შემდეგ - უცხოურ ენებზე. სამეცნიერო ნაშრომის მითითებისას უნდა დასახელდეს ავტორის(ავტორების) გვარი და ინიციალები, ნაშრომის სახელწოდება, სამეცნიერო ჟურნალის სახელწოდება, წელი, ტომი, ნომერი, გვერდები; წიგნის ან მონოგრაფიის მითითებისას უნდა დასახელდეს სახელწოდება, ავტორის (ავტორების) გვარი და ინიციალები, გამომცემლობა, გამოცემის წელი; ამასთან, ცალ-ცალკე უნდა გამოიყოს სამეცნიერო ლიტერატურა და ნორმატიული დოკუმენტები.

თ) დანართები (საჭიროების შემთხვევაში) დანართში შეიძლება განთავსდეს მონაცემთა ცხრილები, ნახაზები, სქემები, პროგრამები, გაანგარიშებები, დიაგრამები და ა.შ.

3. სტუდენტი ვალდებულია სქოლიოში მიუთითოს ვებგვერდიდან მოპოვებული ინფორმაცია, შესაბამისი ბმულის და ინფორმაციის მოპოვების თარიღის მითითებით. სქოლიოს შრიფტია 10.

4. სტუდენტის მიერ ნაშრომში შესაბამისი მითითების გარეშე სხვისი ნაშრომის/მოსაზრებების გამოყენება ჩაითვლება პლაგიატად და სტუდენტს გაუფორმდება შეფასება 0.

5. სტუდენტმა დაცვის წინ ფაკულტეტზე უნდა წარადგინოს ნაშრომის ამობეჭდილი ვერსია ოთხ ეგზემპლარად.

მუხლი 5. სამაგისტრო ნაშრომი და თემის ხელმძღვანელი

1. სამაგისტრო ნაშრომი არის სამეცნიერო-კვლევითი პროექტი, რომელიც წარმოადგენს სტუდენტის მიერ სამაგისტრო საგანმანათლებლო პროგრამის ფარგლებში შესწავლილი სასწავლო კურსების საფუძველზე ჩატარებულ კვლევას. სამაგისტრო ნაშრომი შედგება 40-60 გვერდისგან, რომლის შემუშავების დროსაც გამოყენებულ უნდა იქნეს არანაკლებ 15 სამეცნიერო ნაშრომი, მათ შორის აუცილებელია არანაკლებ ერთი უცხოური ლიტერატურა. სამაგისტრო ნაშრომი უნდა შესრულდეს ქართულ ენაზე. გამონაკლისია ინგლისურენოვანი საგანმანათლებლო პროგრამები.

2. სამაგისტრო ნაშრომის შესრულება მოიცავს ერთ სემესტრს.

3. სამაგისტრო ნაშრომის ხელმძღვანელები წინასწარ განისაზღვრებიან რექტორის ბრძანებით, თითოეული საგანმანათლებლო პროგრამის ფარგლებში უნდა იყოს არანაკლებ სამი თემის ხელმძღვანელისა. სტუდენტი თემის ხელმძღვანელთან შეთანხმებით არჩევს მისთვის სასურველ თემას და არეგისტრირებს ფაკულტეტზე.

მუხლი 6. სამაგისტრო ნაშრომისადმი წაყენებული მოთხოვნები

1. სამაგისტრო ნაშრომში უნდა გამოვლინდეს სტუდენტის ცოდნისა და მეცნიერული კვლევების შესაბამისობა პროგრამით განსაზღვრულ

მოთხოვნებთან. სამაგისტრო ნაშრომი უნდა აკმაყოფილებდეს ამ ინსტრუქციის მე-4 მუხლით დადგენილ მოთხოვნებს მცირედი გამონაკლისების გარდა.

2. დასკვნაში სტუდენტმა უნდა წარმოაჩინოს კონკრეტული პრობლემის გადაჭრის ხედვა და შეიმუშავოს შესაბამისი რეკომენდაციები. სამაგისტრო ნაშრომი საბაკალავრო ნაშრომისგან განსხვავებით არის დამოუკიდებელი კვლევის საფუძველზე შემუშავებული ნაშრომი.

3. სტუდენტის მიერ ნაშრომში შესაბამისი მითითების გარეშე სხვისი მოსაზრებების გამოყენება ჩაითვლება პლაგიატად და სტუდენტს გაუფორმდება შეფასება 0.

4. სტუდენტმა დაცვის წინ ფაკულტეტზე უნდა წარადგინოს სამაგისტრო ნაშრომის ოთხი ამობეჭდილი ეგზემპლარი. სამაგისტრო ნაშრომის დაცვის შემდეგ 81 ქულაზე მაღლა შეფასებული ნაშრომი გადაეცემა უნივერსიტეტის ბიბლიოთეკას. ხოლო, საუკეთესო შეფასების მქონე ნაშრომი იბეჭდება უნივერსიტეტის სამეცნიერო ჟურნალში.